




HEHEURAA API

»»»»»
SETEPA 1940

FAAITERAA I TO TE MAU HAAPAORAA FAAROO ATOA

IA ora na i te feia atoa o te tai'o i te HEHEURAA API.
 I teie nei taime te faaite atu nei matou ia outou a-
 toa i to matou mauruuru rahi no ta outou tai'oraa i teie nei
 ve'a.

I te ava'e Tiurai i mairi a'enei ua neneihia i roto i teie ve'a
 te hoê mau parau, oia hoi, *Te Maitiraa i te Hoê Ekalesia*, ei
 faaiteraa i te tahi mau parau haapiiraa a te Ekalesia a Iesu
 Mesia i te Feia Mo'a i te Mau Mahana Hopea Nei. Na taua
 mau parau ra i faatupu mai i te pahonoraa a te hoê haapao-
 ra faaroo ê. No te reira i mauruuru ai matou. E mea tia i-
 ho â ia ia na reirahia. Ua mauruuru matou no te evanelia,
 no te Buka a Moromona, e no te mau haapiiraa viivii ore e
 te taa ohie to roto ra. Te faaroo nei matou e, ia faaite atu
 matou i te evanelia a Iesu i te feia atoa e tia'i, e ia faaroo
 atoa matou i ta to te mau haapaoraa atoa e parau mai, e ia fe-
 ruri matou no nia i te reira e tia'i. Te imi nei matou i te mau
 parau mau atoa, e e ore te faaroo e a ore râ te parau a te
 hoê noa'tu taata, e a ore râ, a te hoê noa'tu ekalesia, e faa-
 huru ê i te parau mau.

No reira, te titau atu nei matou i to outou mau mana'o, e
 te faaite nei matou i to matou mauruuru i te fariiraa i te reira.

*Te haamori nei matou i te Atua mana hope mai tei au i te aau nei, e e faa-
 tia'tu hoi ia na reira atoa te taata atoa ia haamori, noa'tu te huru, te vahi,
 e te mea ta ratou e hinaaro.*

NO TE AHA E MEA TIA IA VAI TE HAAPAORAA?

No te aha e mea ê ta te mau taata mau raveraa?

No te aha te vai nei te mau taata roo maitai e te mau taata aita to ratou e roo maitai; te tahi mau taata maitai, te tahi mau taata ino; te tahi mau taata paieti e te tah imau taata tuhi noa?

Teie paha te pahonuraa e au i te reira: Te taata roo maitai ra, te faaroo ra ia oia i na ture e hoê ahuru, e aita te taata ino i faaroo i te reira. E tiaturi te taata maitai i te mau parau ta Iesu i parau i nia i te mou'a ra, e te taata mana'o ino ra, aita ia oia i tiaturi i te reira. E tiaturi te taata paieti i te Atua, area, te taata parau-ino ra, aita oia e tiaturi nei ia'na e te faaino atu nei oia ia'na.

Te vai nei te hoê mea papu, oia hoi: Te rave nei tatou mai te au i to tatou mau tiaturiraa tei faaite i to tatou huru mau. Te faaroo nei au i te roo maitai, no reira e tia i te taata ia tiaturi mai ia'u. Te faaroo nei au i te autaeaeraa o te mau taata atoa, no reira e riro iho â ia vau ei taata herehia.

Ia ite-ana'e-hia te huru mau o te faaroo o te hoê taata, e mea tia roa ia faaite-papu-hia te mau ohipa o te hotu mai no roto mai i te reira.

E parau paari no te oraraa o te mau taata tataitahi.

Ua arataihia te mau taata atoa, noa'tu e taata maitai e a ore râ e oviri, i roto i ta'na mau ohipa e te hoê amuiraa tiaturiraa. Eita te reira e tia ia faaitehia mai i te mau taima atoa na roto i te parau, area râ, te vai ra te reira ma te papu i roto i te aau o te taata nei. O te mau maamaa ana'e tei ere i te reira mau mana'o faatere.

Ua parau-atoa-hia te mau tiaturiraa tei faarave i te taata i te ohipa, te parau paari o te oraraa nei, no te mea te faatere nei ratou i te mau ohiparaa atoa. Area râ, i roto i te hoê hi'oraa ra, te mau tiaturiraa tei aratai i te taata e tei horoa mai ia'na i te oaoa, ua rahi a'e ia i te parau paari, ua riro ia ratou ei *Haapaoraa Faaroo*.

Te vai ra te auaa mau o te parau *Haapaoraa Faaroo*, no te mea, ta'na ohipa, o te faatupu ia i te imiraa i te parau mau i roto i te taata e ia faarave i te reira i te ohipa. Ua tano taua parau ra *Haapaoraa Faaroo* ia riro te faaroo i te Atua

ei tufaa no te parau paari o te oraraa nei. E ia na reira mai te hoê, te taata feruriraa maitai, e haapaoraa faaroo ia ta'na e e taata paieti oia. O te taata râ o te parau e, aita to'na e haapaoraa faaroo, te haavare ra ia oia ia'na iho.

Te faufaa rahi no te Haapaoraa Faaroo.

Te *Haapaoraa Faaroo*, o te tiaturiraa ia o te faatupu i te mau raveraa a te taata, o te mea rahi a'e i roto i teie nei ao taatoa; e mea tia ia riro ia ei feruriraa tuutuu ore o te mau taata maramarama. A hi'o na i to'na faufaa rahi; na'na i faaoti i te tereraa o te huru o teie nei ao; ua horoa oia i te manuia e te manuia ore i te taata; ua aratai oia i te rahiraa o te taata i te oaoa e i te oto atoa. Mai te au i te mau tiaturiraa o te nunaa, ua tupu te tama'i e a ore râ te hau; ua parahi hau noa te taata e a ore râ ua taninahia ratou i te aua-hi; ua faaea mai te maramarama e te poiri i nia i te ao nei. Te parau tuatapapa o te ao nei, o te parau tuatapapa ia o to'na mau tiaturiraa faaroo, i te rahiraa o te mau taime. Ua tupu te tama'i rahi hopea nei na roto i te mau mana'o tama'i o te tahi pae taata.

E ere i te mea tia ia faaino i te haapaoraa faaroo, no te mea aita te hoê taata i ere i te reira. E vai te haapaoraa faaroo i muri a'e ia tatou e e vai noa oia noa'tu i te mau ati. Terra râ, e mea tia ia riro te reira ei haapaoraa faaroo te tia ia horoa mai i te manuïaraa i te mau taata o te mau nunaa atoa. Te hopea o te ao nei ua hau atu to'na vairaa i roto i te haapaoraa faaroo i te tahi atu mau mea.

Te Haapaoraa Faaroo tei hinaarohia i teie nei mau mahana.

Aita roa teie nei ao i riro mai te au i te tia ia riro oia ra, no te mea aita te *Haapaoraa Faaroo* i horoa mai ia'na i te tautururaa te au maitai ia'na. E ere te mau haapaoraa faaroo, tei itehia, i te mea tia roa e te papu hoi. I te hoê huru ohipa rahi mai te reira, e ere ia i te mea maitai ia haavarehia tatou i nia i taua vahi ra. E rave rahi te mau huru tia ore i nia i teie nei ao tei riro ei tumu no te inoino o te taata e te peapea no te ao taatoa nei, area râ, eiaha te reira ia riro ei tumu peapea no te feia tei haapao i te mau ture a te Atua e ta te natura. E tia i te taata ia haamaitai i te reira, mai te mea e rave oia i te reira na roto i te tiaturiraa maitai. O tatou nei, te mau tamarii o teie nei tau, a ani ana'e tatou i te *Haapaoraa Faaroo* ia horoa mai oia i te maitai, te peapea ore e te oaoa. Mai te mea aita, eaha ia to'na faufaa?

Ua rave rahi te mau ma'i tei tairi i te fenua nei e i te mau tamarii a te taata nei. E tia roa i te *Haapaoraa Faaroo*, o te itehia i roto i to tatou oraraa i te mau mahana atoa, ia aratai ia tatou i te oraraa ma'i ore e ia horoa mai i te faaururaa i te paari no te tautururaa ia'na ia imi i te mau ravea no te faataeraa ia tatou i te îraa o te oraraa o te tino nei.

Na te veve e faaere i te milioni taata e rave rahi i te oaoa. Area râ, eiaha tatou e haamo'e i teie, te horoa nei te fenua i te mau mea atoa e au ia tatou tataitahi. E mea tia roa ia tauturu mai te *Haapaoraa Faaroo* ia tatou no te faaoreraa i te reira huru ino, no te mea tei roto tatou i te hoê tau no te haereraa i mua.

Te haapeapea nei te huru oraraa o te taata i te hau o te ao atoa nei. E mea tia roa ia faaite mai te *Haapaoraa Faaroo* i te e'a no te faatupuraa i te au-taeae-raa hohonu roa i rotopu i te mau taata, e na roto i te reira e tia'i ia ratou ia ite i te oaoa i roto i te oraraa nei.

Te faaere nei te mau peu unauna e te mau oro'a faufaa ore i te varua o te mea ta'na e imi nei, oia hoi, te ravea ia unauna i roto i te faaroo. Te *Haapaoraa Faaroo*, ia tamâhia oia i ta'na mau haapiiraa tahito, e tia roa ia ia'na ia aratai i te nuu rahi o te ao nei i roto i te hoê faaapîraa upootia no'na iho e no te amuiraa taata. E teie ia te titauraa o te amuiraa taata, o te maitai e te hau o te taata tataitahi.

To tatou faaroo e to tatou mau tiaturiraa, ia riro ia ratou ei tufaa mau no ta tatou mau ohipa i te mau mahana atoa. E mea tia roa ia haapaohia te *Haapaoraa Faaroo*, eiaha i te fare pureraa ana'e, i te fare e i te vahi raveraa ohipa atoa ra. Te hoê haapaoraa no te sabati ana'e, o te hoê ia haapaoraa faaroo tei tatufaahia e tei horoa i te mauruuru tatufaahia. Ia tae te tau e riro ai te mau fare atoa ei fare no te Atua, e haamata ia te hoê tau apî. E mea tia ia ia ore te mau mârôraa no nia i te PARAU MAU i rotopu i te *Haapaoraa Faaroo* e te Parau Paari. E mea tia roa ahiri te *Haapaoraa Faaroo* e haapii i te fariiraa i te mau parau mau atoa e te patoiraa i te mau haapiiraa papu ore e te tumu ore—Ei reira te ao nei e huti maitai ai i to'na aho.

Ua faahahihia te feruriraa o te taata na roto i te hoê faaiteraa tia ore o to huru o te Atua, oia hoi, aita to'na e tino, e mea toetoe oia, e e mana noa iho oia i rotopu i te mau mana, e aita'tu ai. E mea tia roa ia haapii mai te *Haapaoraa Faaroo* e, o te Atua ra, o to tatou ia Metua mai te au i to tatou iteraa i tana parau mau ra. Ia horoa atoa mai oia i te hau i roto i te mafatu tei tano to'na tupairaa i te hinaaro o

to tatou Metua mure ore.

E mea tia roa ia pou mai te *Haapaoraa Faaroo* no nia mai i tera'i, no te haere mai e parahi i rotopu i te mau taata i nia i te fenua nei. E mea maitai a'e ia vai te oaoa i roto i to'na iho utuafare, e ia rave maitai i te ohipa i roto i te hoê vahi haehaa, i te haere e haamori i roto i te hoê fare pure-raa nehenehe roa. I roto i te oraraa i teie tau, te ani nei te mau taata i te hoê *Haapaoraa Faaroo* te riro ia ratou mai te huru o te toto i te tino nei. Aita e faufaa te mau fafauraa no te mau oaoa o te ra'i no te taata tei poia i te faraoa no te pae tino ana'e.

Teie ia te mea e titauhia nei i te *Haapaoraa Faaroo* i teie mau mahana nei, e aratai anei oia i te taata i te fenua i parauhia ra, te vahi te reira te oaoa hopea ra?

Te vai nei te hoê *Haapaoraa Faaroo* apî.

Aita te mau haapaoraa faaroo tei faatiahia i roto i te mau Ekalesia e rave rahi, noa'tu i to ratou maitai, to ratou tura e to ratou hinaaro ia haapii i te maitai, i faaafaro i te mau hape ta ratou i rave, no te mea ua faarue riirii noa ratou i te parau mau o te haapaoraa faaroo mau. Te haapii noa nei ratou i te hoê noa iho tufaa o te parau mau.

Tei roto i te Evanelia a Iesu Mesia taatoa te mau haapii-raa e te mau raveraa, te mana no te haamauruuru i te mau hinaaro o te taata nei. O oia ana'e te haapaoraa faaroo tei mau i te reira huru mana. Tei roto i te Ekalesia i faatia-faa-hou-hia te mau tufaa maitai a'e o te mau haapaoraa faaroo atoa.

Te mauui nei te fenua no te mea eita e tia ia'na ia haapao i te mau haapiiraa a Iesu no Nazareta. E ahoaho rahi te haapaoraa faaroo e ravehia nei, e te ao nei, i roto i te poiri. O te haapaoraa faaroo tahito a Iesu Mesia tei hau atu ia ratou atoa e o oia ana'e te tia ia faaora i te mau mauui o te fenua nei.

Te cherisetianoraa, o te hoê ia ravea maitai e te tia no te maitai o te taata nei, i te mau vahi atoa, i te mau mahana atoa. Eita te taata tei mairi, e tei riro ei rave hara, e ite faa-hou i raro a'e i te tapearaa o te mauini. Aita roa i vai i roto i te opuaraa a te Mesia ia faarue i te taata i roto i to'na mauini, area râ, na te haapaoraa faaroo e tauturu ia'na ia i-te i taua mauui ra.

E mea tia roa i te mau tane e te mau vahine maitai ia rave ratou i to ratou itoito no te imiraa e te fariiraa i te mau parau mau mure ore, e ia noaa mai ia ratou te reira mauhaa, ia haere i mua e tama'i, ma te parau-tia, i te haavare i roto i to'na mau huru atoa. Ia oioi a'e te reira i te ravehia, e oioi atoa mai ia te hitiraa mai o te mahana no te oaoaraa, i roto i to'na atoa ra mau huru, i nia i te fenua atoa nei. Ia rahi roa'tu te mau taata te haere i roto i taua aroraa ra, e oioi atoa mai ia te rê i te noaa. E ere i te mea tia ia manui noa te mau taata atoa nei no te mea te haapii nei te tahi pae o te mau Ekalesia i te tahi noa iho tufaa o te parau mau, e te parau hape atoa hoi.

E horoaraa api e te tahito atoa hoi.

Te vai nei, i rotopu i te taata nei, te *Haapaoraa Faaroota* te taata e titau nei no te haavî atu i te mau peapea atoa. Ua parare te îraa o te parau mau, tei haapiihia e te Faaora, i nia i te fenua atoa nei, e ua itehia oia i roto i to'na mau huru atoa i roto i te Ekalesia a Iesu Mesia i te Feia Mo'a i te Mau Mahana Hopea Nei.

Tei taua *Haapaoraa Faaroo*, oia hoi, te Evanelia mau a Iesu Mesia, te parau mau e te mana no te haapiiraa cheris-tiano. Ua rahi to'na mau manuiaraa i roto i te hanere matahiti o to'na oraraa, no te tatararaa i te mau uiraa peapea e te ahoaho tei faaarepurepu i te aau o to te ao atoa nei. Ua noaa mai i to'na mau melo te hoê tino maitai roa, te faufaa huru rahi, te oaoa no te oraraa nei, te feruriraa maramarama e te ite o te pae varua teitei a'e. Ua tauturu oia no te haamaramarama i te mau miterio o te oraraa nei. E au te reira mau haapiiraa no te mau ohipa o te mau mahana atoa nei. E aratai te reira i te raveraa i te mau parau mau atoa. Ua faaite oia ia tatou, e te faaite faahou nei oia ia tatou i te e'a no te oaoa i nia i te ao nei, no te pae tino e no te pae varua atoa hoi.

E faaitehia, i muri a'e, te aamu nehenehe no te faatiaraa, i teie mau mahana nei, i te Ekalesia a te Mesia.

Ua hinaaro anei outou i te ite i te reira? E faaiteraa hana-hana te reira no te parau mau.

*Papaihia e Ioane A. Widtsoe, te hoê Aposetolo
Faaauhia ei reo Tahiti e Marcel Bonnet*

TE PARAU AUTAHU'ARAA

No te Ava'e ATOPA

TE MAU TAATA TUIROO O TE BIBILIA

E MAU UIRAA

1. O vai teie taata? 2. Eaha to'na toro'a? 3. Eaha te huru o to'na maitiraahia? 4. I hea ta'na ohipa i ravehia'i? 5. Eaha te ohipa i oti ia'na? 6. Ua mauruuru anei te mau taata ia'na? 7. Ua mauruuru anei te Atua ia'na? 8. E manuia anei tatou ia pee tatou ia'na? A tara mai.

Atopa 6. MARIA MAGADALA. Mataio 27:56, 61; Luka 8:2; 24:10; Mareko 15:40, 47; 16:9; Ioane 19:25; 20:1, 11-18.

Atopa 13. MARETA. Luka 10:38-41; Ioane 11:1-47; 12:2.

Atopa 20. ZAKAIO. Luka 19:2-8.

Atopa 27. A haapii atu i te parau no na Haapii Hahaere no te ava'e i mua, mai tei papaihia i roto i te ve'a no te ava'e Atopa.

Na Te Mau Maapii

Mahaere na te Mau Utuafare

TE PARAU PAARI

Te faaitoito nei ta tatou ekalesia i te titauroa ia haapao te Feia Mo'a atoa i te *Parau Paari*. E faaueraa ia no te faaoraraa i te taata i ta te tino nei. Ia feruri rii tatou no nia i tei papaihia i roto i te *Parau Paari* e au ai.

A vaiiho roa'tu i te avaava. E raau teie no te puaatoro, eiaha no te taata. A vaiiho atoa i te mau mea veavea mai te taofe e te ti. E mea ino roa te maa veavea no te tino, e ia rave-noa-hia ia, te vai ra paha te mahana e otoi ai tatou. Aita e faufaa ia faarahi noa tatou i te parau no te oreraa i te inu i te uaina, te ava, e te mau mea atoa e ava faataero to roto ra. Ia mârô te taata e, e maa teie no te maitai o te tino, te tamata nei oia ia faatia i to'na iho hape.

Eiaha atoa tatou ia faarahi i te amu i te inai. Na te inai e faatupu i te ahu i roto i te tino; e au te reira no te raveraa i te ohipa i te fenua toetoe roa. I o nei ra, aita te tino e maitai i te inai rahi, no te veavea i te mau mahana atoa.

Te na ô atoa maira te *Parau Paari* e, a rave i te mau mea atoa mai te paari. No reira, e ture ia na te Atua, ia vaiiho-roa-hia te mau mea atoa e ino ai te tino. E mai te mea e roaa mai ia tatou te haamaitairaa, e mea na roto ia i te haapaoraa i te ture.

TE SOTAIETE VAHINE TAUTURU

No te Ava'e ATOPA

Irava tamau aau: Alama 40: 26

E e ore e tia i te hoê mea viivii ia ô i te basileia ra a te Atua; e tiavaru-
hia ra ratou i rapae, e vaiihohia ia amu i te huero o ta ratou ra ohipa, o tei
ino.

Mahana Maha (Matamua)

Mahana iritiraa mana'o e te himene na te mau tuahine.
Parau tumu no na Tuahine Hahaere: Te Tia-faahou-raa. A-
lama pene 40.

Mahana Maha (Piti)

MORONI, te raatira rahi i nia i te ati Nephi, o tei aratai
i te mau nuu tama'i.

To'na maitiraahia. Alama 43:17.

Te huru o ta'na faatereraa e to'na manuïaraa. Alama 43:
17-54.

Te aau etaeta o Zerahemana, e to'na haavîraahia. Alama
pene 44.

Mahana Maha (Toru)

Te tupuraa o te teoteo o te ati Nephi. Alama 45:23, 24;
46:1-7.

Te pii a Moroni i te mau taata ia paruru i to ratou fenua.
Alama 46:12, 22.

Te tama'iraa ia Amalikia e to'na mau taata. Alama 46:
31-36.

Mahana Maha (Maha)

Moroni i te faaineine-faahou-raa no te tama'i. Alama 48:
11-25.

Te tama'i. Alama 49.

Mahana Maha (Hopea)

Mahana raveraa ohipa na te mau tuahine.

TE HAAPIIRAA SABATI

No te Ava'e ATOPA
PUPU PARAIMEREIrava tamau aau: *II Paraleipomeno 10: 7*

E ia parau atu oe ia ratou i te parau maitai, e riro ratou ei tavini no oe e a muri noa'tu.

Atopa 6. Te haaparariraa i te hoê basileia rahi. I Te Mau Arii 12:1-24; II Paraleipomeno 10:1-19.

Atopa 13. Te arii o tei aratai i te ino. I Te Mau Arii 12: 25-33.

Atopa 20. Te peropheta tei pau i te liona. I Te Mau Arii 13.

Atopa 27. Hi'opoaraa.

PUPU PITI

Irava tamau aau: *I Te Mau Arii 5: 4, 5*

I teie nei ra, ua horoa tau Atua ra o Iehova i te hau ia'u e ati noa'e; aita hoi e enemi, aita hoi e ino. E teie nei, te opua nei au i te fare e faatia no te i'oa o tau Atua, no Iehova.

Atopa 6. Davida te metua tane aroha noa. II Samuela 15-18.

Atopa 13. Solomona e te hiero matamua. I Te Mau Arii 4; 5; 7; 10.

Atopa 20. Rehoboama te arii tei mârô i te arii. I Te Mau Arii 12 e tae noa'tu i te 17; Isaia 5:26-29.

Atopa 27. Hi'opoaraa.

PUPU TORU e te MAHA

Irava tamau aau: *Exodo 14: 11, 12*

E ere anei o vau, o Iehova? E teie nei, e haere oe, e ei pihai atoa iho vau i to vaha, e na'u e faaite ia oe i te parau ia parau oe ra.

Atopa 6. To Mose fanauraahia e te ohipa i faataahia na raua o Aarona. Exodo 1:8-22; 2; 3; 4.

Atopa 13. To Mose haereraa'tu i mua i te aro o Pharao e te mau ati i nia i te fenua. Exodo 5; 7; 10.

Atopa 20. Te oro'a no te Pasa e te haamataraa o to Isera-ela taa-ê-raa i Aiphiti. Exodo 11; 12; 13.

Atopa 27. Hi'opoaraa.

TE FEIA API



No te Ava'e ATOPA

Irava tamau aau: *III Nephi 12:48*

E teie nei, te hinaaro nei au ia maitai roa outou mai to'u e to to outou Metua i te ao e maitai roa ra.

Atopa 6. TE TIA-FAAHOU-RAA E TE MAUERA. Mataio pene 28; Mareko 16; Luka 24; Ioane 20; 21.

Atopa 13. TE OHIPA A TE MAU APOSETOLO. Te Ohipa 1:15-26; 2:1-41; 3:6; 4:8-37; 5:33-40; 6:1-15; 7:1-15; 8:1-4; 9:1-28; 11:19; 13:9; 16:37-40; 22:17-28; 23:17-27; 25:11; 26:32; 28:19.

Atopa 20. TE TAHI ATU A MAU MAMOE. Mataio 10:5-7; 13:23; 12:14-21; 21:41-44; Ioane 4:21-23; 10:14-16; Te Ohipa 10:1-48; 13:44-49; Buka a Moromona III Nephi 15:12-21.

Atopa 27. TE OHIPA A TE FATU I ROTOPU I TE ATI NEPHI. Ioane 10-16; Helamana 14:14-27; III Nephi pene 9 e tae noa'tu i te pene 28.

TE HAAPIIRAA PARAIMERE

No te Ava'e ATOPA

Irava tamau aau: *Ioane 3:36*

O tei faaroo i te Tamaiti ra e ora mure ore to'na; e o te ore i faaroo i te Tamaiti ra e ore oia e ite i te ora; te vai ra ia te riri o te Atua i nia iho ia'na.

MAHANA MAHA (MATAMUA)

No Hea Mai Au?

Ua ite anei oe no nea mai tatou? E faaite atu vau ia oe. I te hoê tau tahito roa, aita roa e taata e parahi ra i nia i te fenua nei. Te vai ra râ tatou mai te tino ore, e varua noa, i te ao ra. Hoê â huru te hoho'a o to tatou varua e to tatou nei tino. I to tatou faaearea i reira ua rave noa tatou i te ohipa, e ua tamau noa tatou i te mau parau man.

Ua faatere ihora to tatou Metua Rahi i te hoê amuiraa, e ua faaite maira Oia ia tatou i te parau no te ao nei, e ua faaite atoa mai Oia e, e tonohia tatou i te reira ao, e horoahia mai ia tatou te tino, ia tia ia tatou ia haapii â, e ia rave â i

te ohi
tou ia
tatou
Te
opuar
tiamâ
varua
i te fe
te fen
Ua
e na r
e ua b
No
ei mei
tua, i
reira

Ua
ra te
man a
rauraa
e rave
orua,
i to te
to te r
e pohe
Ua
mai e,
e pohe
amu a

Ua
e te in
haama
No t
i ta te
rau n
re ei ti
vahi e
ia mait
ia a to
Ana i

te ohipa. E horoahia ia tatou te tiamâ; oia hoi, e tia ia tatou ia maiti i te maitai e a ore râ te ino, te mau mea atoa ta tatou e hinaaro.

Te vai ra râ te hoê varua iriâ, tei ore i mauruuru i te mau opuaraa o to tatou Metua. Aita oia i hinaaro ia horoahia te tiamâ i te taata. Ua orurehau teie varua, e ua rave rahi te varua tei pee ia'na. Ua hurihia ratou i rapae e i raro, i nia i te fenua i hamani-apî-hia, e te parahi noa nei ratou i nia i te fenua nei, o Satane e ta'na mau pipi.

Ua maitihia ihora te hoê ei metua no tatou i nia i te ao nei, e na roto ia'na e noaa'i ia tatou to tatou tino. O Adamu teie, e ua horoahia ia'na te hoê tauturu, o Eva to'na i'oa.

No reira, ua horoahia ia Adamu raua o Eva te tia ia riro ei metua no tatou atoa nei. Ei mauhaa raua na to tatou Metua, i te faarahiraa, e i te faaîraa i te ao nei i te taata. No reira mai tatou.

MAHANA MAHA (PITI)

I Te O i Edene

Ua tuuhia Adamu raua o Eva i roto i te O i Edene, tei reira te mau raau maitai atoa, e te mau raau rii maitai atoa, te mau animala, e te mau mea atoa ta raua e hinaaro. O te parauraa ia te Metua Rahi ia raua e, "A hi'o na i te mau mea e rave rahi Ta'u i hamani. Te horoa'tu nei Au i te reira na orua, e e tia ia orua ia rave i to taua mau mea nei, maori râ i to te raau e ite ai i te maitai e te ino. Eiaha orua e amu i to te reira raau, e i te mahana e amu ai orua, ei reira orua e pohe ai."

Ua haavare maira râ te ofi, o Satane, ia Eva, i te na ôraa mai e, "E hotu maitai roa to teie raau. A amu, eita roa oe e pohe." Ua amu ihora Eva, e i to Adamu taeraa mai, ua amu atoa oia, ia ore oia ia faataa-ê-hia i ta'na vahine.

Ua iritibia ihora to raua mata, e ua taa ia raua te maitai e te ino. Ua ite raua e, te vai tahaa noa ra raua, e no to raua haama, tapuni ihora raua.

No to Adamu raua o Eva amuraa i teie hotu, ua pohe raua i ta te varua, aita'tura i tia ia raua ia ite mata e ia paraparaa noa i te Metua rahi. Ua faarirohia to raua tino tahuti ore ei tino tahuti, e na tuu-ê-hia'tu raua i rapae i te Ô, i te vahi e tia'i ia raua ia rave i te ohipa, ia fanau i te tamarii, ia maiti i te ino e te maitai, e ia tamatahia. O te opuaraa hoi ia a to tatou Metua, te ravea ora i faaitchia mai ia tatou e Ana i roto i te Apooraa rahi i tera Ao.

No reira, ua mauruuru roa tatou i to tatou na metua matamua, no te mea, na roto i to raua raverāa i tia'i ia tatou ia fanauhia, e ia tapea maitai i to tatou tiamāraa. E mai te mea e, e haapao maitai tatou, e e rave noa i te maitai, te vai ra te taime e ite faahou ai tatou i to tatou Metua Rahi, e e horoa mai Oia i te haamaitairaa rahi ia tatou.

MAHANA MAHA (TORU)

Kaina e Abela

I muri rii a'era i to Adamu raua o Eva tiavaruraahia i rapae i te O i Edene, ua fanau Eva i na tamarii tamaroa, o Kaina raua o Abela. Ua tupu ihora raua, mai te tamarii iho â te huru, e ia huru paari raua, ua maiti raua i te ohipa ta raua i hinaaro i te rave. Oia hoi, ua rave Kaina i te ohipa faaapu, e ua rave Abela i te ohipa tia mamoe. Ua ite roa raua i te rave i ta raua ohipa.

E taata huru iriâ râ Kaina, no reira aita oia i au maitai i to'na teina, o Abela. E taata mārû Abela, e te herehia e te mau taata, e ia hi'o Kaina ia'na, e mea papu e, aita roa oia i oaoa.

Ua rave ihora Abela i te hoê mamoe maitai roa, hopoi atura i nia i te fata, pûpû atura ia'na ei tusia i te Atua. Ua na reira oia mai te haehaa e te hinaaro mau ia tavini e ia faatura i te Atua. No reira, ua mauruuru te Atua ia'na.

Ua rave atoa Kaina i te hoê tufaa no ta'na mau faufaa, oia hoi, te mau maa o te fenua, hopoi atura i te reira ei ô na te Atua. Aita râ oia i haehaa maitai, e aita oia i haapao maitai i te mau hinaaro o te Atua, no reira, aita te Atua i maururu ia Kaina, e ua riri roa Kaina, no te mea, ua fariihia ta Abela ô, ta'na râ, aita ia. Ua parau maira te Atua, "E Kaina, eaha oe i riri ai? Aita anei oe i ite, mai te mea e rave oe i te ohipa maitai, e fariihia ia?"

I muri iho, no to Kaina riri-noa-raa ia Abela, ua tupai oia ia Abela, e pohe roa ihora Abela. O teie te taparahiraa matamua, e te pohe matamua i nia i te ao nei.

Ua ui maira te Atua ia Kaina, "E Kaina e, teihea to oe teina?" Ua pahono atura Kaina e, "Aita vau i ite: o vau anei te tia i to'u teina?"

Ua riri te Atua i teie, e ua anatema oia ia Kaina. E iri ereere Ta'na i horoa ia'na, e i teie nei â mahana te ite nei tatou i to'na huaai, o te popaa ereere ia, e aita e horoahia ia ratou te autahu'araa, no te mea, ua anatemahia ratou. Te vai ra paha te mahana e tia'i ia ratou ia farii i te reira, mai te mea e haapao maitai ratou.

MAHANA MAHA (MAHA)

Enoha

Ua taparahihia Abela, e ua anatemahia Kaina, no reira aita to Adamu raua o Eva e tamaiti haapao maitai e tae noa'tu ua fanauhia Seta. Ua mauruuru roa rana i to'na fanau-raahia no te mea, e riro paha oia ei mono ia Abela, ei taata haapao i ta te Atua parau.

E taata haapao iho â Seta, e ua haapii oia i ta'na mau tamarii i te mau parau no te Atua. Te hoê o to'na huaai, o Enoha ia. Ua fanauhia oia i te tau i ino roa'i te mau taata o te ao nei. Te parau noa maira Satane i te mau taata, e te faaroo noa'tura ratou ia'na.

Ua parau maira te Atua ia Enoha, na ô maira, "A haere oe, a a'o oe i teie nei mau taata i te tatarahapa. Noa'tu to oe ite ore i te parau, e faariro vau ia oe ei mauhaa i roto i To'u nei rima."

Ua farii maira Enoha i ta te Atua parau, haere ihora oia e poro haere i te evanelia i rotopu ia ratou. E no to'na mana no ô mai i te Atua, ua rurutaina te mau taata, e ua faaroo ratou i ta'na i parau atu. Ua riro oia ei aratai no taua feia ra. Na'na ratou i aratai ia tae mai to ratou mau enemii, e no te faaroo rahi o teie feia, ua manuia ratou. Ua mātā'u a'era te mau nunaa atoa i teie feia no te Atua. Ia parau ana'e Enoha, e tahe ê atu te mau anavai, e hopoi-ê-hia'tu te mau mou'a. Ua mana to teie taata!

Porro haere noa ihora Enoha i rotopu i teie nei feia, e no to ratou fariuraa i te Atua, ua parauhia to ratou oire, o Ziona. E taata parau-tia ana'e to roto i Ziona, aita e taata ona, aita atoa e taata veve. Ua aifaito noa te mau taata atoa.

I te hopea ihora, ua afai-ê-hia'tu taua oire ra, o Ziona, no te mauruuru o te Atua i na reirahia'i. Te vai ra te mahana, ia vai te parau-tia i nia i te fenua taatoa nei, e ho'i mai ai taua oire ra i te fenua nei.

Ia tamata tatou atoa ia faariro ia tatou iho mai ia Enoha e to'na feia. Ia haapao maitai tatou i te parau a to tatou na metua, e ia haapii noa tatou i te mau ohipa maitai. Ei reira e haamaitai mai ai te Atua ia tatou.

MAHANA MAHA (HOPEA)

Na te orometua iho e maiti i te haapiiraa.

EDITORIALE

E te mau taata maitai o te Moana Patitifa Apatoa o te rave nei i teie nei ve'a, ia ora na.

Ua tuuhia'tu Keneta R. Setefano, peresideni, o tei rave i te ohipa orometua no te Ekalesia a Iesu Mesia i te Feia Mo'a i te Mau Mahana Hopea Nei, no na matahiti e piti i mairi a'enei, e ua ho'i atu, o oia e to'na utuafare, i to'na fenua ai'a, na nia i te S. S. Monterey. Ua mono-apî-hia oia e te hoê taata tei rave i te ohipa orometua i teie mau fenua nei i te mau matahiti i mairi roa'tu. E rave rahi paha te taata o te u'i tahito e haamana'o ia Tihoni M. Tanona, orometua, o te parahi nei i ô nei i te faatereraa i te mau ohipa no te Heheuraa Apî.

Ei faatere no teie mau ohipa te hinaaro nei au i te faaite i to'u aroha, e to'u oaoa i to outou raveraa i te mau ohipa maitatai, e te ani nei i te Metua Maitai ia haamaitai tamanu â ia outou, te feia parahi tumu o teie mau fenua nehenehe. Ia feruri te taata i te nehenehe o teie nei mau fenua maere, e tia ia'na ia arue i te maitai e te aroha o to tatou Metua i te Ao no to'na haamaitairaa ia outou. Ia rahi to outou mafatu i te arueraa e te haamaitairaa no to outou mau maitai faito ore e tia'i. Ia faataehia te mau pure i nia, ia'na ra, no to'na aroha rahi e tia'i. Ia himenehia to'na maitai i te mau utuafare atoa, e ia faaitehia te maurunuru e tia'i.

I roto i te opuaraa a to tatou Metua i te Ao ra, o Ta'na i faatia no te faaoraraa i Ta'na mau tamarii, aita tatou i haamo'ehia. A hi'o na i te ravea i opuahia e Ana no to outou maitai i ta te pae tino nei, a hi'o na i te mau mea i faatupuhia e i hamanihia no te faufaa o te taata. Mai te mea e, te haamana'o nei Oia ia tatou e tae noa'tu i te horoaraa mai i teie mau mea no te pae tino nei, eita anei e rahi roa'tu ta'na e faaite mai ia tatou no te ora-mure-ore-raa?

I to maua o to'u hoa maitai tereraa mai i teie vahi nehenehe, ua ite au i te tahi mau huru-ê raa tei tupu i roto i na matahiti e maha ahuru e tiahapa i mairi a'enei. Noa'tu râ teie mau huru-ê raa o ta te pae tino nei, te ite noa nei â vanu i te mau huru maitai o te feia Maohi. Te vai noa nei â outou ei feia mārū, e te au maitai e te here, mai ta'u i ite i te i te matamua ra. A haapapu outou i to outou mana'o i te tavini maite â ia'na e ia haapao i Ta'na mau faaueraa. O te pure ia e te hinaaro o to outou taeae iti,

Tihoni Tanona

Ua Maiti Au Ia Oe

*F*ERE o outou tei hinaaro mai ia'u, o vau râ tei hinaaro atu ia outou. O teie te mau parau ta Iesu i horoa mai ia tatou. Ia tai'o tatou i te reira, ia noaa ia tatou iho te papuraa no to tatou oraraa i nia i teie nei ao.

A hi'o i te oraraa o Iesu, aita oia i maiti i te Atua, te Metua mure ore, i roto i ta'na ohipa i nia i te ao nei, area râ, na maitihia e ua faataahia'tura Oia e te Atua. Ua ite tatou i te hoê parau tei parauhia e Iesu, oia hoi, *O tei haapao-atoa-hia ia outou hou te tumu o teie nei ao.*

No reira ua ite tatou e, ua maitihia te feia maitai, e te Atua no te haereraa mai i nia i teie ao nei e no te parahiraa i rotopu i te mau taata; e na haapii ia ratou i te ravea o te parau-tia. Ua parau atoa mai te Faaora e, *Ua haapao ia outou e ia hotu i te huero, ei huero vaiiho taiata.*

Mai te mea e, te vai nei to'na feia maitihia i nia i teie nei ao, i teie mahana, no te aha aita Oia e horoa nei ia ratou i teie mana ia rave ratou i te ohipa i To'na i'oa? No te aha aita Oia e horoa mai nei ia ratou i teie autahu'araa mo'a, ia faatere i To'na feia mo'a e ia faaite mai ia ratou i Ta'na ohipa? O te hinaaro ia o te Mesia, ia vai noa To'na mana i nia i te ao nei ia faatiahia te faaroo i rotopu i Ta'na mau tamarii.

Ua ite tatou e, aita roa i tia i te hoê taata ia poro-haere atu i te evanelia a te Atua, maori râ, tei ia'na taua mana ra. E te tahi horoaraa, tei roto i te ekalesia, o te faaoraraa ia i te feia ma'i. Ua ite Simona i te mana o na aposetolo ra, ia raua i tuu i to raua rima i nia iho i na taata i Ierusalema, no te horoaraa i te Varua Maitai. Ua haapoirihia to'na mana'o e te hara no te mea e, ua hinaaro oia i te hoo mai i teie mana mau o te Atua i te moni. *Ua parau atura Petero ia'na, Ia reva atoa'tu ta oe moni e o oe atoa i te pohe, o oe i mana'o e, e hoona ta te Atua i horoa noa maira i te moni. Aita roa a oe faufaa i teie nei parau, aore roa i tia to oe aau i mua i te aro o te Atua ra. E teie nei, e tatarahapa oe i taua hara na oe nei, e e pure i te Atua, peneia'e o te matara taua hara mana'o aau na oe na. Te hi'o atu nei au ia oe mai te au avava ra, e mai te mea ruuruuhia i te ino ra.*

E a feruri atoa i te arii o Iuda ra, o Uzia. Ua pohe oia i te oovi no te mea, ua tamata oia i te rave i te ohipa mo'a a te Atua, e aita to'na e mana no ō mai i te Atua.

I teie atoa tau ua horoahia teie mana o te Atua, eiaha rā no te taata. Te faaite nei te Ekalesia a Iesu Mesia i te Feia Mo'a i te Mau Mahana Hopea Nei i te ao nei e, ua faaho'hia mai teie mana i te i'oa o te Atua ra, na roto ia Iosepha Semita, te Peropheta.

A feruri, e a pure no nia i teie mau parau, *Ia horoa mai te Metua ia outou i ta outou e ani atu ma To'u nei i'oa ia'na ra.* Amene.

Papaihia e Setanela B. Nance

Ia Ore Te Taata Ia Fanau Faahou

U A tae mai te maramarama i nia i te ao nei, e mai te mea eita te taata e farii i te reira, e faahapahia ia oia. Oia mau, ua tae mai te parau mau, te vai nei te parau mau i rotopu ia tatou nei, e mai te mea eita te taata e imi e e farii i te reira, ua ati roa ia, no te mea te vai nei te parau mau no te taata o te hinaaro i te rave i te reira.

I roto i to tatou tai'oraa i te Bibilia ua ite tatou e, ia baptizohia tatou e tia'i. Te faaite mai nei te reira ia tatou i roto i te Ioane 3:1-3, *Te parahi ra te hoê Pharisea o Nikodemā te i'oa, e tavana no te ati Iuda: o tei haere mai i te rui ia Iesu ra, e ua parau maira ia'na, E Rabi, ua ite matou e, e orometua oe mai o mai i te Atua ra; e ore hoi teie nei mau tapao ta oe e rave nei e tia i te taata, auā te Atua atoa ra. Ua parau atura Iesu, na ō atura ia'na, Amene, amene, e parau atu vau ia oe, Ia ore te taata ia fanau faahou ra, e ore oia e ite i te basileia o te Atua ra.*

E parau mau te reira i teie nei mau mahana, ia ore te taata ia fanauhia mai no roto mai i te pōiri i te parau mau, eita e tia ia'na ia ite i te mea ē i ropu i te taata, i roto i te Ekalesia e te taata i rapae ra. Mai te mea eita te taata e fanau faahou-hia mai te reira te huru, e faaea noa oia i roto i te pōiri.

Te vai nei anei te hoê mea huru ē o te taata tei baptizohia e te taata tei ore i baptizohia? Oia mau! Te vai nei te mea huru ē roa. A rave na i na taata toopiti, hoê ā to raua maitai, e to raua aroha, e to raua parau-tia, ua baptizohia te tahi, aita rā te tahi i baptizohia. Te vai nei te mea huru

ē roa i ropu ia rāua no te mea ua riro, i te hoē o taua na taata toopiti, te ravea ia tae atu i te Atua, na roto i te haapaoraa i te mau faaueraa a te Atua, e te faaea noa ra te tahi i roto i te pōiri. Te faaite mai nei Iesu ia tatou i te reira na roto i te Ioane 3:2, *Ua parau atura Iesu, na ô atura ia'na, Amene, amene, e parau atu vau ia oe, Ia ore te taata ia fanau faahou ra, e ore oia e ite i te basileia o te Atua ra.*

No reira ua ite tatou e, e tia ia baptizohia tatou. Area râ, na rau te huru o te mau baptizoraa i te ao nei. Eaha ia te baptizoraa mau? A hi'o i te hoho'a ta Iesu i horoa mai ia tatou nei, te reira ia te baptizoraa mau. Te faaitehia mai nei ia tatou i te reira i roto i te Mataio 3:16, 17, *E oti a'era Iesu i te baptizohia, haere maira oia i nia mai raro mai i te pape, e inaha, vetea a'era te ra'i ia'na, hi'o a'era oia i te Varua o te Atua i te pouraa mai mai te uupa ra, e te tauraa mai i nia iho ia'na: e inaha, o te reo maira no te ra'i mai, i te na ôraa mai e, Tau Tamaiti here teie, ua mauruuru roa vau ia'na.*

Eaha te huru baptizoraa ta Iesu i faaite mai ia tatou nei? Maori râ te utuhi no te mea e, ua haere oia i nia mai raro mai i te pape. No reira e mea tia ia fanau-faahou-hia tatou, mai te hoho'a ta Iesu i vaiiho mai ia tatou nei. E mai te mea e, e fanan-faahou-hia tatou mai te reira, ua haamata ia tatou i te haere na nia i te e'a e tae atu ai i te basileia o te Atua.

Papahia e Melavina D. Christensen

PARAU API NO TE MISIONI

Ua tae mai te parau api no Hikueru mai, oia hoi, ua tomo ratou te hoē fare pureraa api tei faatiahia i Tokirau. Ua haamatahia te paturaa i taua fare ra i te 4 no Tiurai i mairi a'enei, e na roto i te mana'o tahoē o taua amara ua oti roa te reira e i te 7 no Tiurai ua tomohia te reira i raro a'e i te faatereraa o Kehauri a Tumahani. E fare niau taua fare ra tei tapoihia i te punu, e teie to'na faito, oia hoi, e hitu metera e te afa i te roa, e e maha metera e te afa i te aano. I muri a'e i te tomoraa i taua fare ra ua faatupuhia te hoē amuraa maa rahi, e ua oaoa maitai te mau taata tei tae atu i reira.

I te 6 no Atete i mairi a'enei i reva'tu ai Setefano Peresideni, to'na hoa o Aiona, ta raua na tamarii toomaha, e e ono orometua, o Nile Chugg, o Viri Miller, o Horate Wilde, o Rutena Allred, o Re McEntire e o Etera Benson i America, na nia i te pahi rahi ra o S. S. Monterey. Te aroha maira ratou ia tatou e te faaitoito mai nei ratou ia tatou i te raveraa i te maitai.

Ua tae mai, na nia i te S. S. Mariposa, i te 3 no Atete i mairi a'enei, to tatou Peresideni api, o Tihoni M. Tanona, o tei tae mai i mutaa ihora ei orometua (matahiti 1893), e to'na hoa, o Edena. Te aroha atoa mai nei raua ia tatou na roto i te Editoriale i roto i teie nei ve'a.

Na nia atoa i te S. S. Mariposa ua tae mai te Peresideni api no te Misioni i Samoa, o Emeri, e ta'na atoa ra vahine, e ua reva'tu raua i Samoa. Ua tae atoa mai, na nia i te S. S. Monterey, hoē ahuru ma toru orometua no Niu Zelani, Australia e Samoa; te ho'i atu nei ratou i to ratou fenua ai'a.

I te Sabati, te 4 no Atete i mairi a'enei ua faarookia, i roto i te Pureraa Autahu'araa no te amaa i Papeete, te mau faaiteraa i roto i na reo eē e ono ra, oia hoi, te reo Farani, te reo Baratane, te reo Samoa, te reo Tahiti, te reo Paomotu e te reo Maori no Niu Zelani.

TE MAU PARAU API

Ua pinepine roa te ua e te hiona utente i te itehia i roto i teie mau tau i mairi a'enei, e te tumu o te reira, o te repo fenua ia o te tufaa fenua Oklahoma tei afaihia na roto i te reva e te mau mata'i puai roa ra.

A tamaa'i te hoê taata i te fare o te hoê o to'na mau hoa ua ite oia, i roto i te hoê noa iho tio, na poe e maha ahuru ma hitu ra. E, i roto i taua mau poe ra, te vai ra e toru tei tae ra i te faito ra, e ono milimetera e te afa i te rahi ra.

I te tahi fenua ua haapao noa te taata o te hoê oire i te hoê ohipa area-roa tahito, oia hoi, te faataaraa i te pata paari na nia i te aroâ, i roto i te mau hanere matahiti e rave rahi. E ane'i te mau feia faatirere pata paari i nia i te hoê vahi teitei e i reira ratou e haamata'i i ta ratou faatirereraa, e te taata tei noaa ia'na te rê, tei ia'na ia te mau pata paari.

I te oire ra i Buffalo, America, ua haapao na hoa e toru o te taata ra o Albert E. Vagt, te peresideni i pohe no te hoê pūpū feia ravaai, i to'na binaaro hopea, oia hoi, ua faarue ratou i te rehu o to'na ra tino i roto i te anavai ra o Niagara ma te parau atu i teie nei parau: "E te mau i'a rii e, eita e tia ia mātā'u faahou outou ia'u."

Mai te matahiti 1492 mai â, ua opanihia te fare pureraa nainai o Ioane Bapetizo, i roto i te fare pureraa rahi o St. Lorenezo i Venisia, Italia, i te mau vahine e tae noa'tu i te mau paretenia vahine, no te mea ua riro te hoê vahine, oia hoi o Salome, ei tumu no to'na poheraa.

I teie nei e tia i te taote i te faaore i te mata tei ereere, e te tahi atu â mau uriuri i roto i na hora e 24 ra, na roto i te hoê pamuraa, na roto i te hoê ravea uira, i te hoê raau tei parauhia e histamine o te faarahi i te mau uaua haereraa toto ia tia i te reira ia ho'i atu i roto i te tino atea ra.

I te matamua, i te fenua Mexico, e mea varavara roa te mutoi, e mai te au i te mau parau tutuu, ua riro te mau fare atoa ei pâ no ratou iho. E i teie nei mau mahana, na te mau haamaramarama tei auahia i te varavara auri e faahaamana'o i te tau tahito i Mexico ra.

Na roto i to te ao nei ohuraa i nia ia'na iho, e mairi iho â te hoê mea te tuuhia mai, no te hoê vahi teitei, i te pae i te hitia o te râ o te vahi mau no reira to'na tuuraahia mai. (Oia hoi, e iva centimetera no te teitei ra e toru hanere metera.) Mai te mea e taora-afaro-hia te hoê mea no nia i te fenua ra i nia, ia mairi mai oia ra, e mea é roa te ohipa e tupu, no te mea e mairi ia oia i te pae o te tooa o te râ i te vahi i taorahia'i ra.

Ua noaa i te iore pererau te ravea ia ora noa i roto i te tau toetoe. E haere ratou i roto i te mau ana e i reira ratou e faatautau ai ia ratou iho ma te piri roa, e e vai noa ratou i reira, mai te huru varea taoto ra, e tae noa'tu ua oti te tau toetoe.

Marcel Bonnet, Gérant

Ralph J. Richards, Éditeur de la Mission

Eugène M. Cannon, Imprimeur

Neneihia e te MISIONI TAHITI no te Ekalesia a Iesu Mesia i te Feia Mo'a i te Mau Mahana Hopea Nei. Orovini, Papeete, Tahiti.

Te hoo: e 5 farane i te matahiti; e 10 farane no na matahiti e toru.